



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

12.01.2021թ.

Ո Ր Ո Շ ՈՒ Մ

ՀՀ գնումների հետ կապված բողոքներ քննող անձի թիվ ԳԲՔԱ-ՆԳ-2020/105

Հայաստանի Հանրապետության գնումների հետ կապված բողոքներ քննող անձը՝ ի դեմս Գրիգոր Ներսիսյանի,

Մասնակցությամբ՝

«Լիվարդ Շին» ՍՊԸ-ի լիազորված ներկայացուցիչ

Ա.Պարանյանի (լիազորագիր՝ տրված 25.12.2020թ.),

Ա. Ի. Ալիխանյանի անվան ազգային գիտական լաբորատորիա (Երևանի ֆիզիկայի ինստիտուտ)» հիմնադրամի լիազորված ներկայացուցիչ Ա. Պետրոսյանի (լիազորագիր՝ տրված 24.12.2020թ.),

քննելով «Ա. Ի. Ալիխանյանի անվան ազգային գիտական լաբորատորիա (Երևանի ֆիզիկայի ինստիտուտ)» հիմնադրամի կարիքների համար թիվ 6 մասնաշենքի մասնակի վերանորոգման աշխատանքների ձեռքբերման նպատակով հայտարարված «ԱԱԳԼ-ԳՀԱՇՁԲ-21/2» ծածկագրով գնանշման հարցման ընթացակարգի շրջանակներում «Աշկար» ՍՊԸ-ի կողմից 22.12.2020թ. ներկայացված (23.12.2020թ. վարույթ ընդունված) բողոքը (հետայսու նաև՝ ԳԲՔԱ-ՆԳ-2020/105 բողոք) և կից փաստաթղթերը, պարզեցի հետևյալը.

1. «Աշկար» ՍՊԸ-ի կողմից ներկայացված փաստերը, հիմնավորումները և պահանջը.

«Աշկար» ՍՊԸ-ն (հետայսու նաև՝ Ընկերություն) 22.12.2020թ. ներկայացված բողոքով հայտնել է հետևյալը.

«1.1 «Ա. Ի. Ալիխանյանի անվան ազգային գիտական լաբորատորիա (Երևանի ֆիզիկայի ինստիտուտ)» հիմնադրամը (այսուհետ՝ Պատվիրատու) 03.12.2020 թվականին հայտարարել է «ԱԱԳԼ-ԳՀԱՇՁԲ-21/2» ծածկագրով գնման ընթացակարգ (այսուհետ նաև Ընթացակարգ), իր կարիքների համար՝ թիվ 6 մասնաշենքի մասնակի վերանորոգման աշխատանքների ձեռքբերման նպատակով:

1.2 Ընթացակարգի գնահատող հանձնաժողովը (այսուհետ՝ Հանձնաժողով) որոշում է կայացրել հրավիրել բանակացություններ, մասնակիցների կողմից ներկայացված նոր գնային առաջարկների արդյունքում Ընթացակարգի ընտրված մասնակից է ճանաչվել «Լիվարդ Շին» ՍՊԸ-ն (այսուհետ՝ Մասնակից):

1.3 Պատվիրատուն կայացրել և 18.12.2020 թվականին հրապարակել է որոշում Մասնակցի հետ պայմանագիր կնքելու վերաբերյալ և սահմանվել է անգործության ժամկետ:

«Գնումների մասին» ՀՀ օրենքի 3-րդ հոդվածի 2-րդ մասի համաձայն՝ գնումների գործընթացը հիմնվում է հետևյալ սկզբունքների վրա.

1) գնման գործընթացի միասնական կանոններով մրցակցային, թափանցիկ, համաչափ, հրապարակային և ոչ խտրական հիմունքներով կազմակերպում.

2) պայմանագրի կնքման նպատակով մասնակիցների շրջանակի ընդլայնում և նրանց միջև մրցակցության խրախուսում.

3) ցանկացած անձի համար, անկախ նրա օտարերկրյա ֆիզիկական անձ, կազմակերպություն կամ քաղաքացիություն չունեցող անձ լինելու հանգամանքից, գնման գործընթացին մասնակցելու իրավահավասարություն:

«Գնումների մասին» ՀՀ օրենքի 10-րդ հոդվածի համաձայն՝

1. Մինչև պայմանագիր կնքելը պատվիրատուն տեղեկագրում հրապարակում է հայտարարություն պայմանագիր կնքելու որոշման մասին ոչ ուշ, քան ընտրված մասնակցի մասին որոշման ընդունմանը հաջորդող առաջին աշխատանքային օրը:(...):

2. Պայմանագիր կնքելու մասին որոշումը պարունակում է ամփոփ տեղեկատվություն

հայտերի գնահատման և ընտրված մասնակցի ընտրությունը հիմնավորող պատճառների մասին ու հայտարարություն անգործության ժամկետի վերաբերյալ: Անգործության ժամկետը պայմանագիր կնքելու մասին որոշման հայտարարության հրապարակման օրվան հաջորդող օրվա և պատվիրատուի կողմից պայմանագիրը կնքելու իրավասության առաջացման օրվա միջև ընկած ժամանակահատվածն է:

3. Մրցույթի և էլեկտրոնային աճուրդի դեպքում անգործության ժամկետը առնվազն 10 օրացուցային օր է: Գնման այլ ընթացակարգերի համար անգործության ժամկետն առնվազն հինգ օրացուցային օր է:

4(...):

5. Պատվիրատուն պայմանագիրը կնքում է, եթե սույն հոդվածի 3-րդ մասով նախատեսված անգործության ժամկետում որևէ մասնակից գնումների հետ կապված բողոքներ քննող անձին չի բողոքարկում պայմանագիր կնքելու մասին որոշումը: (...):

6. (...):

«Գնումների մասին» ՀՀ օրենքի 36-րդ հոդվածի 1-ին մասի համաձայն՝

1. Պայմանագիր կնքվում է գնահատող հանձնաժողովի որոշման հիման վրա՝ պատվիրատուի կողմից:

2. Սույն օրենքի 10-րդ հոդվածով սահմանված անգործության ժամկետը լրանալուն հաջորդող չորս աշխատանքային օրվա ընթացքում պատվիրատուն ծանուցում է ընտրված մասնակցին՝ ներկայացնելով պայմանագիր կնքելու առաջարկը և պայմանագրի նախագիծը: Ընդ որում, պայմանագիրը կարող է կնքվել ոչ շուտ, քան սույն օրենքի 10-րդ հոդվածով սահմանված անգործության ժամկետը լրանալու օրվան հաջորդող երկրորդ աշխատանքային օրը:

3. (...):

Գնումների գործընթացի կազմակերպման կարգի 32-րդ կետի 2-րդ ենթակետի համաձայն՝ մասնակիցը գնային առաջարկը ներկայացնում է ինքնարժեք, շահույթ և ավելացված արժեքի հարկ ընդհանրական բաղադրիչներից բաղկացած հաշվարկի ձևով: (...):

Գնումների գործընթացի կազմակերպման կարգի 41-րդ կետի համաձայն՝ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ ներառյալ այն դեպքերը, երբ հայտում ներառված՝ Հայաստանի Հանրապետության ռեզիդենտ հանդիսացող մասնակցի կողմից հաստատված

փաստաթղթերը կամ դրանց մի մասը հաստատված չեն էլեկտրոնային թվային ստորագրությամբ, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին **էլեկտրոնային եղանակով ծանուցում է մասնակցին՝** առաջարկելով մինչև կասեցման ժամկետի ավարտը շտկել անհամապատասխանությունը: Եթե անհամապատասխանությունն արձանագրվել է ՀՀ պետական եկամուտների կոմիտեից ստացված տեղեկատվության հիման վրա, ապա մասնակցին ուղարկվող ծանուցմանը կցվում է նաև կոմիտեից ստացված տեղեկատվության բնօրինակից սկանավորված տարբերակը: Մասնակցին ուղարկվող ծանուցման մեջ մանրամասն նկարագրվում են հայտնաբերված անհամապատասխանությունները:

Գնումների գործընթացի կազմակերպման կարգի 42-րդ կետի համաձայն՝ Եթե սույն կարգի 41-րդ կետով սահմանված ժամկետում մասնակիցը շտկում է արձանագրված անհամապատասխանությունը, ապա նրա հայտը գնահատվում է բավարար: Հակառակ դեպքում տվյալ մասնակցի հայտը գնահատվում է անբավարար և մերժվում է, ներառյալ եթե մասնակիցը սույն կարգի 32-րդ կետի 1-ին մասի «ե» պարբերությամբ սահմանված ժամկետում չի ներկայացնում հայտի ապահովման բնօրինակը, իսկ ընտրված մասնակից է ճանաչվում հաջորդող տեղ զբաղեցրած մասնակիցը:

Գնումների գործընթացի կազմակերպման կարգի 40-րդ կետի 5)-րդ ենթակետի համաձայն՝ հանձնաժողովը հրավերի պահանջների նկատմամբ բավարար գնահատված հայտեր ներկայացրած մասնակիցներից որոշում և հայտարարում է ընտրված և հաջորդաբար տեղեր զբաղեցրած մասնակիցներին: Ապրանքների գնման դեպքում հանձնաժողովը գնահատում է նաև ներկայացված ապրանքի ամբողջական նկարագրերի համապատասխանությունը հրավերի պահանջներին: Առաջարկված նվազագույն գների հավասարության դեպքում, կամ եթե ոչ գնային պայմանները բավարարող գնահատված հայտեր ներկայացրած բոլոր մասնակիցների ներկայացրած գնային առաջարկները գերազանցում են տվյալ ընթացակարգի շրջանակում գնվելիք ապրանքների, աշխատանքների կամ ծառայությունների գնման հայտով սահմանված գինը կամ **գնումն իրականացվում է օրենքի 15-րդ հոդվածի 6-րդ մասի հիման վրա՝**

ա. ընտրված և հաջորդաբար տեղեր զբաղեցրած մասնակիցներին որոշելու նպատակով հանձնաժողովի նիստում առաջարկված գների նվազեցման նպատակով ոչ գնային պայմանները բավարարող գնահատված բոլոր մասնակիցների հետ վարվում են

միաժամանակյա բանակցություններ, եթե նիստին ներկա են բոլոր մասնակիցները (համապատասխան լիազորություն ունեցող ներկայացուցիչները),

բ. հակառակ դեպքում հանձնաժողովի նիստը կասեցվում է, և մեկ աշխատանքային օրվա ընթացքում գնահատող հանձնաժողովի քարտուղարը բավարար գնահատված բոլոր մասնակիցներին **էլեկտրոնային ձևով միաժամանակ ծանուցում է** գների նվազեցման շուրջ միաժամանակյա բանակցությունների վարման օրվա, ժամի և վայրի մասին,

գ. բանակցությունները վարվում են ոչ շուտ, քան ծանուցումն ուղարկվելու օրվան հաջորդող օրվանից երկրորդ և ոչ ուշ, քան հինգերորդ աշխատանքային օրը,

դ. յուրաքանչյուր մասնակցի՝ տվյալ պահին ներկայացրած գնային առաջարկը հրապարակվում է մյուս մասնակիցների համար, և մինչև բանակցությունների համար նախատեսված վերջնաժամկետի ավարտը մասնակիցը կարող է վերանայել իր գնային առաջարկը,

ե. բանակցությունների համար սահմանված վերջնաժամկետը լրանալու պահին, ըստ դրան ներկա մասնակիցների ներկայացրած գների, որոնք չեն գերազանցում գնման հայտով սահմանված գինը, որոշվում ու հայտարարվում են ընտրված և հաջորդական տեղերն զբաղեցրած մասնակիցները,

զ. բանակցությունների համար սահմանված վերջնաժամկետը լրանալու պահին, եթե դրան ներկա մասնակիցների ներկայացրած գները գերազանցում են գնման հայտով սահմանված գինը, ապա գնահատող հանձնաժողովը կարող է բանակցությունների արդյունքում ցածր գնային առաջարկ ներկայացրած մասնակցին հայտարարել ընտրված մասնակից՝ պայմանով, որ՝

- միևնույն գնման առարկայի բնութագրերով տվյալ օրացուցային տարում արդեն իսկ կազմակերպվել է առնվազն մեկ գնման մրցակցային ընթացակարգ, որը չկայացած է հայտարարվել մասնակիցների ներկայացրած գները գնման հայտով սահմանված գինը գերազանցելու հիմքով պայմանավորված.

- ընտրված մասնակցի հետ կնքվող պայմանագրով նախատեսված կողմերի իրավունքներն ու պարտականություններն ուժի մեջ են մտնում գնման հայտով սահմանված գինը գերազանցող չափով լրացուցիչ ֆինանսական միջոցներ նախատեսվելու և դրա հիման վրա կողմերի միջև համաձայնագիր կնքելու դեպքում: Ընդ որում համաձայնագիրը կնքվում է լրացուցիչ ֆինանսական միջոցները նախատեսվելուն հաջորդող երեք աշխատանքային օրվա ընթացքում՝ ապրանքի մատակարարման, աշխատանքի կատարման կամ ծառայության մատուցման ժամկետները երկարաձգելով պայմանագրի

կնքման օրվանից մինչև համաձայնագրի կնքման օրն ընկած ժամանակահատվածով: Սույն պարբերության համաձայն կնքված պայմանագիրը լուծվում է, եթե կնքելուն հաջորդող երեսուն օրացուցային օրվա ընթացքում լրացուցիչ ֆինանսական միջոցներ չեն նախատեսվում.

է. բանակցությունների համար սահմանված վերջնաժամկետը լրանալու պահին, եթե դրան ներկա մասնակիցների ներկայացրած գները գերազանցում են գնման հայտով սահմանված գինը կամ նվազագույն գները հավասար են, գնման ընթացակարգն օրենքի 37-րդ հոդվածի 1-ին մասի 1-ին կետի հիման վրա հայտարարվում է չկայացած, բացառությամբ սույն ենթակետի «զ» պարբերությամբ նախատեսված դեպքի:

Գնումների գործընթացի կազմակերպման կարգի 43-րդ կետի 1)-ին ենթակետի համաձայն՝ հայտերի բացման և գնահատման նիստի ավարտից հետո ոչ ուշ, քան հաջորդող աշխատանքային օրը հանձնաժողովի քարտուղարը՝ հայտերի բացման և գնահատման նիստի արձանագրության բնօրինակից արտատպված (սկանավորված) տարբերակը և սույն կարգի 32-րդ կետի 25-րդ ենթակետի հիման վրա ստացված հիմնավորումների քննարկման ամփոփաթեթը, որը պարունակում է տեղեկություններ նաև հիմնավորումները ստանալու ամսաթվի և էլեկտրոնային փոստի հասցեների վերաբերյալ, հրապարակում է տեղեկագրում: Եթե հիմնավորումներ չեն ներկայացվել, ապա հանձնաժողովի նիստի արձանագրության մեջ դրա մասին կատարվում են համապատասխան նշումներ: Ընդ որում, հանձնաժողովի նիստի արձանագրության մեջ մանրամասն նկարագրվում են արձանագրված անհամապատասխանությունները և դրանցով պայմանավորված հայտերի մերժման հիմքերը:

1. Հանձնաժողովի 10.12.2020 թվականի թիվ 21/2-2 որոշմամբ հաստատվում է, որ «ԱՇԿԱՐ» սահմանափակ պատասխանատվությամբ ընկերության հայտը գնահատվում է բավարար, որը հրապարակված է գնումների պաշտոնական տեղեկագրում (կցվում է):

2. Հանձնաժողովի 11.12.2020 թվականի թիվ 21/2-3 շտկված որոշմամբ և ի հայտ եկած հանգամանքներում պարզվում է, որ «ԱՇԿԱՐ» սահմանափակ պատասխանատվությամբ ընկերության կողմից ներկայացված ծավալաթերթ-նախահաշվում առկա են թվաբանական սխալներ, մասնավորապես հաշվարկները սխալ են կատարված, որը հրապարակված է գնումների պաշտոնական տեղեկագրում (կցվում է):

3. «ԱՇԿԱՐ» սահմանափակ պատասխանատվությամբ ընկերությունը Օրենքով և Կարգով սահմանված ժամկետում կատարելով համապատասխան շտկումները

էլեկտրոնային փոստի միջոցով ուղարկում է Պատվիրատուի պաշտոնական էլեկտրոնային փոստին:

4. Հանձնաժողովի 15.12.2020 թվականի թիվ 21/2-4 որոշմամբ «ԱՇԿԱՐ» սահմանափակ պատասխանատվությամբ ընկերության հայտը գնահատվում է բավարար և 17.12.2020 թվականի ժամը 11:00-ից մինչև 12:00-ն հրավիրվում է գների նվազեցման միաժամանակյա բանակցություններին մասնակցելու, որը հրապարակվում է գնումների պաշտոնական տեղեկագրում 18.12.2020 թվականին (կցվում է):

5. «ԱՇԿԱՐ» սահմանափակ պատասխանատվությամբ ընկերությունը պատշաճ ծանուցված և տեղեկացված չլինելով բանակցությունների անցկացման ժամի, օրվա, վայրի և անցկացման կարգի մասին, զրկվում է գների նվազեցման միաժամանակյա բանակցությունների մասնակցության իր իրավունքից:

6. Հանձնաժողովի 17.12.2020 թվականի թիվ 21/2-5 որոշմամբ ընթացակարգի ընտրված մասնակից է ճանաչվում «Լիվարդ Շին» սահմանափակ պատասխանատվությամբ ընկերությունը և սահմանվում է անգործության ժամկետ, որը հրապարակվում է գնումների պաշտոնական տեղեկագրում 18.12.2020 թվականին (կցվում է):

7. Միաժամանակ տեղեկացնում ենք, որ ընթացակարգի կազմակերպման և իրականացման ողջ ժամանակահատվածում Ընկերության էլեկտրոնային փոստին (մասնակցության հայտում նշված) ընթացակարգի վերաբերյալ ոչ մի ծանուցում, տեղեկատվություն չի ստացվել, Ընթացակարգի վերաբերյալ տեղեկատվությունը միայն հասանելի է եղել Ընկերությանը գնումների պաշտոնական տեղեկագրից և հայտերի բացման նիստում թվով տասներկու մասնակիցների շրջանակներում նվազագույն գինը ներկայացվել է «ԱՇԿԱՐ» սահմանափակ պատասխանատվությամբ ընկերության կողմից:

8. Օրենսդիրը հստակ սահմանել է այն ընթացակարգը, թե ինչպես պետք է իրականացվեն Հանձնաժողովի գործառույթները հայտը բավարար գնահատելու և ընտրված մասնակից ճանաչելու պարագայում, որտեղ սահմանված չէ հայտերի գնահատման ժամկետի ընթացքում կամ դրանից հետո Հանձնաժողովի կողմից կրկին որևէ գործառույթ իրականացնելու, այդ թվում՝ բանակցություններ հրավիրելու ոչ պատշաճ ծանուցման լիազորություն: Իսկ այդպիսի գործողությունների կատարման արդյունքում գործ ունենք հակամրցակցության և գնումների գործընթացի սկզբունքների խախտման հետ: Հանձնաժողովի կողմից Ընթացակարգի շրջանակում կայացված որոշումները, որոնք նախատեսված չեն օրենքով և անմիջական ազդեցություն են ունենում մասնակիցների

ձեռնարկատիրական գործունեության սահմանափակմանը կամ խտրական մոտեցմանը հանդիսանում են հակամրցակցային, և ի թիվս նշվածի յուրաքանչյուր դեպքում անհրաժեշտ է անդրադառնալ իրավիճակային խնդրի կարգավորման նախադեպերին, որպեսզի հնարավոր լինի ապահովել ոչ խտրական մոտեցումը»:

Ամփոփելով վերոգրյալը՝ Ընկերությունը խնդրել է վերացնել «ԱԱԳԼ-ԳՀԱՇՁԲ-21/2» ծածկագրով գնանշման հարցման ընթացակարգի հանձնաժողովի 17.12.2020թ. թիվ 21/2-5 արձանագրությունը, իսկ «Ա. Ի. Ալիխանյանի անվան ազգային գիտական լաբորատորիա (Երևանի ֆիզիկայի ինստիտուտ)» հիմնադրամին պարտավորեցնել «ԱԱԳԼ-ԳՀԱՇՁԲ-21/2» ծածկագրով գնանշման հարցման ընթացակարգի շրջանակներում կազմակերպել և իրականացնել գների նվազեցման միաժամանակյա նոր բանակցություններ՝ գնումների մասին ՀՀ օրենսդրությանը համապատասխան:

Ընկերությունը, պատշաճ ծանուցված լինելով բողոքի քննության նպատակով 28.12.2020թ. ժամը 10:00-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

2. «Ա. Ի. Ալիխանյանի անվան ազգային գիտական լաբորատորիա (Երևանի ֆիզիկայի ինստիտուտ)» հիմնադրամի կողմից բողոքի վերաբերյալ ներկայացված դիրքորոշումը և հիմնավորումները.

«Ա. Ի. Ալիխանյանի անվան ազգային գիտական լաբորատորիա (Երևանի ֆիզիկայի ինստիտուտ)» հիմնադրամը (հետայսու նաև՝ Պատվիրատու) Գնումների հետ կապված բողոքներ քննող անձին ուղղված գրությամբ հայտնել է հետևյալը.

«Հայտնում ենք Ձեզ, որ «Ա. Ի. Ալիխանյանի անվան ազգային գիտական լաբորատորիա (Երևանի ֆիզիկայի ինստիտուտ)» հիմնադրամի կողմից սույն թվականի դեկտեմբերի 3-ին կազմակերպվել է «ԱԱԳԼ-ԳՀԱՇՁԲ-21/2» ծածկագրով մրցույթ գնումների մասին ՀՀ օրենքի 15-րդ հոդվածի 6-րդ մասի համաձայն: Մրցույթի ընթացքում օրենքի սահմանված կարգով բոլոր մասնակիցները ծանուցվել են armeps համակարգի միջոցով:

Գների նվազեցման բանակցությունների արձանագրությունը հրապարակվել է gnumner.am պաշտոնական կայքում:

Այս կապակցությամբ գտնում ենք, որ «Աշկար» ՍՊԸ-ի կողմից ներկայացված բողոքը անհիմն է և ենթակա է մերժման»:

Պատվիրատուն, պատշաճ ծանուցված լինելով բողոքի քննության նպատակով 28.12.2020թ. ժամը 10:00-ին հրավիրված նիստի վերաբերյալ, ապահովել է իր ներկայացուցչի մասնակցությունը, ով իր հերթին պնդել է ներկայացված դիրքորոշումը:

3.«Լիվարդ Շին» ՍՊԸ-ի կողմից բողոքի վերաբերյալ ներկայացված միջնորդությունը.

«Լիվարդ Շին» ՍՊԸ-ի կողմից ներկայացվել է գրավոր միջնորդություն՝ ԳԲՔԱ-ՆԳ-2020/105 բողոքով իրեն որպես երրորդ կողմ ներգրավելու վերաբերյալ:

Գնումների հետ կապված բողոքներ քննող անձի կողմից միջնորդությունը բավարարվել է:

4. ԳԲՔԱ-ՆԳ-2020/105 բողոքի քննության համար էական նշանակություն ունեցող փաստերը.

ԳԲՔԱ-ՆԳ-2020/105 բողոքի քննության համար էական նշանակություն ունեն հետևյալ փաստերը.

1. «Ա. Ի. Ալիխանյանի անվան ազգային գիտական լաբորատորիա (Երևանի ֆիզիկայի ինստիտուտ)» հիմնադրամի կարիքների համար թիվ 6 մասնաշենքի մասնակի վերանորոգման աշխատանքների ձեռքբերման նպատակով հայտարարվել է «ԱԱԳԼ-ԳՀԱՇՁԲ-21/2» ծածկագրով գնանշման հարցման ընթացակարգ (հետայսու նաև՝ Ընթացակարգ), որին մասնակցելու նպատակով հայտեր են ներկայացրել նաև «Աշկար» և «Լիվարդ Շին» ՍՊ ընկերությունները:

2. Ընթացակարգի գնահատող հանձնաժողովի 15.12.2020թ. թիվ 21/2-4 արձանագրության համաձայն՝ գնահատող հանձնաժողովի կողմից որոշում է կայացվել, ի թիվս այլ մասնակիցների, «Աշկար» և «Լիվարդ Շին» ՍՊ ընկերություններին առաջարկված գների նվազեցման բանակցությունների հրավիրելու վերաբերյալ, որը նշանակվել է 17.12.2020թ. ժամը 11:00-12:00-ն, ք.Երևան, Ալիխանյան եղբայրների փող., 2 վարչական մասնաշենքում:

3. Ընթացակարգի գնահատող հանձնաժողովի քարտուղարը 15.12.2020թ. Armeps էլեկտրոնային գնումների համակարգի (հետայսու նաև՝ Համակարգ) միջոցով ոչ ավտոմատ ծանուցման եղանակով, ի թիվս այլ մասնակիցների, «Աշկար» ՍՊԸ-ին ուղարկել է

ծանուցում՝ հետևյալ բովանդակությամբ. «Կից ԱԱԳԼ-ԳՀԱՇՁԲ-21/2» ծածկագրով մրցույթի գնահատող հանձնաժողովի նիստի արձանագրություն և գների նվազեցման բանակցություններին հրավեր», և կցել թիվ 21/2-4 արձանագրությունը:

4. Ընթացակարգի գնահատող հանձնաժողովի 17.12.2020թ. թիվ 21/2-5 արձանագրության համաձայն՝ գների նվազեցման միաժամանկյա բանակցություններին ներկայացել են «Լիվարդ Շին» և «Նազշին» ՍՊ ընկերությունները, և 1-ին չափաբաժնի մասով ընտրված մասնակից է ճանաչվել «Լիվարդ Շին» ՍՊԸ-ն:

5. ՀՀ գնումների հետ կապված բողոքներ քննող անձի հիմնավորումները և եզրահանգումը.

ՀՀ գնումների հետ կապված բողոքներ քննող անձ Գրիգոր Ներսիսյանս, ուսումնասիրելով «Աշկար» ՍՊԸ-ի 22.12.2020թ. բողոքը՝ կից փաստաթղթերով, «Ա. Ի. Ալիխանյանի անվան ազգային գիտական լաբորատորիա (Երևանի ֆիզիկայի ինստիտուտ)» հիմնադրամի դիրքորոշումը և գործով առկա փաստաթղթերը, հայտնում եմ հետևյալը.

«Գնումների մասին» ՀՀ օրենքի (հետայսու նաև՝ Օրենք) 3-րդ հոդվածը սահմանում է՝

1. Սույն օրենքի նպատակն է ապահովել գնումների գործընթացում հատուցման դիմաց արժեք, այն է՝

1) պատվիրատուին վերապահված լիազորությունների կատարման համար անհրաժեշտ՝ կարիքին համապատասխան ապրանքների, աշխատանքների և ծառայությունների ձեռքբերում՝ համարժեք հատուցմամբ.

2) գնումների և գնումների գործընթացի տնտեսող, արդյունավետ և օգտավետ իրականացում:

2. Գնումների գործընթացը հիմնվում է հետևյալ սկզբունքների վրա.

1) գնման գործընթացի միասնական կանոններով մրցակցային, թափանցիկ, համաչափ, հրապարակային և ոչ խտրական հիմունքներով կազմակերպում.

2) պայմանագրի կնքման նպատակով մասնակիցների շրջանակի ընդլայնում և նրանց միջև մրցակցության խրախուսում.

3) ցանկացած անձի համար, անկախ նրա օտարերկրյա ֆիզիկական անձ, կազմակերպություն կամ քաղաքացիություն չունեցող անձ լինելու հանգամանքից, գնման գործընթացին մասնակցելու իրավահավասարություն:

ՀՀ կառավարության 04.05.2017թ. թիվ 526-Ն որոշմամբ հաստատված «Գնումների գործընթացի կազմակերպման» կարգի (հետայսու նաև՝ Կարգ) 40-րդ կետի 5-րդ ենթակետի համաձայն՝ հայտերի բացման և գնահատման նիստում՝ հանձնաժողովը հրավերի պահանջների նկատմամբ բավարար գնահատված հայտեր ներկայացրած մասնակիցներից որոշում և հայտարարում է ընտրված և հաջորդաբար տեղեր զբաղեցրած մասնակիցներին: Ապրանքների գնման դեպքում հանձնաժողովը գնահատում է նաև ներկայացված ապրանքի ամբողջական նկարագրերի համապատասխանությունը հրավերի պահանջներին: Առաջարկված նվազագույն գների հավասարության դեպքում, կամ եթե ոչ գնային պայմանները բավարարող գնահատված հայտեր ներկայացրած բոլոր մասնակիցների ներկայացրած գնային առաջարկները գերազանցում են տվյալ ընթացակարգի շրջանակում գնվելիք ապրանքների, աշխատանքների կամ ծառայությունների գնման հայտով սահմանված գինը կամ գնումն իրականացվում է օրենքի 15-րդ հոդվածի 6-րդ մասի հիման վրա՝

ա. ընտրված և հաջորդաբար տեղեր զբաղեցրած մասնակիցներին որոշելու նպատակով հանձնաժողովի նիստում առաջարկված գների նվազեցման նպատակով ոչ գնային պայմանները բավարարող գնահատված բոլոր մասնակիցների հետ վարվում են միաժամանակյա բանակցություններ, եթե նիստին ներկա են բոլոր մասնակիցները (համապատասխան լիազորություն ունեցող ներկայացուցիչները),

բ. հակառակ դեպքում հանձնաժողովի նիստը կասեցվում է, և մեկ աշխատանքային օրվա ընթացքում գնահատող հանձնաժողովի քարտուղարը բավարար գնահատված բոլոր մասնակիցներին էլեկտրոնային ձևով միաժամանակ ծանուցում է գների նվազեցման շուրջ միաժամանակյա բանակցությունների վարման օրվա, ժամի և վայրի մասին,

(...):

Այսպես՝ «Ա. Ի. Ալիխանյանի անվան ազգային գիտական լաբորատորիա (Երևանի ֆիզիկայի ինստիտուտ)» հիմնադրամի կարիքների համար թիվ 6 մասնաշենքի մասնակի վերանորոգման աշխատանքների ձեռքբերման նպատակով հայտարարվել է «ԱԱԳԼ-ԳՀԱՇՁԲ-21/2» ծածկագրով գնանշման հարցման ընթացակարգ, որին մասնակցելու նպատակով հայտեր են ներկայացրել նաև «Աշկար» և «Լիվարդ Շին» ՍՊ ընկերությունները:

Ընթացակարգի գնահատող հանձնաժողովի 15.12.2020թ. թիվ 21/2-4 արձանագրության համաձայն՝ գնահատող հանձնաժողովի կողմից որոշում է կայացվել, ի թիվս այլ մասնակիցների, «Աշկար» և «Լիվարդ Շին» ՍՊ ընկերություններին առաջարկված գների

նվազեցման բանակցությունների հրավիրելու վերաբերյալ, որը նշանակվել է 17.12.2020թ. ժամը 11:00-12:00-ն, ք.Երևան, Ալիխանյան եղբայրների փող., 2 վարչական մասնաշենքում:

Ընթացակարգի գնահատող հանձնաժողովի քարտուղարը 15.12.2020թ. Համակարգի միջոցով ոչ ավտոմատ ծանուցման եղանակով, ի թիվս այլ մասնակիցների, «Աշկար» ՍՊԸ-ին ուղարկել է ծանուցում՝ հետևյալ բովանդակությամբ. «Կից ԱԱԳԼ-ԳՀԱՇՁԲ-21/2» ծածկագրով մրցույթի գնահատող հանձնաժողովի նիստի արձանագրություն և գների նվազեցման բանակցություններին հրավեր», և կցել թիվ 21/2-4 արձանագրությունը:

Ընթացակարգի գնահատող հանձնաժողովի 17.12.2020թ. թիվ 21/2-5 արձանագրության համաձայն՝ գների նվազեցման միաժամանակյա բանակցություններին ներկայացել են «Լիվարդ Շին» և «Նազշին» ՍՊ ընկերությունները, և 1-ին չափաբաժնի մասով ընտրված մասնակից է ճանաչվել «Լիվարդ Շին» ՍՊԸ-ն:

Ինչ վերաբերում է բողոքով վկայակոչված այն հանգամանքին, որ «Աշկար» ՍՊԸ-ն պատշաճ ծանուցված և տեղեկացված չի եղել բանակցությունների անցկացման ժամի, օրվա, վայրի և անցկացման կարգի մասին և արդյունքում զրկվել է գների նվազեցման միաժամանակյա բանակցություններին մասնակցելու իր իրավունքից, հարկ եմ համարում հայտնել հետևյալը.

Գնումների հետ կապված բողոքներ քննող անձը 28.12.2020թ. թիվ /ԲՔԱ-ԳՆ/2/19659-2020 գրությամբ դիմել է ՀՀ ֆինանսների նախարարությանը՝ խնդրելով հանձնարարել համապատասխան ստորաբաժանմանը՝ հնարավորինս սեղմ ժամկետում տրամադրելու տեղեկատվություն՝ Ընթացակարգի շրջանակներում «Ա. Ի. Ալիխանյանի անվան ազգային գիտական լաբորատորիա (Երևանի ֆիզիկայի ինստիտուտ)» հիմնադրամի կողմից Armeps էլեկտրոնային գնումների համակարգի միջոցով 15.12.2020թ. իրականացված «ԱԱԳԼ-ԳՀԱՇՁԲ-21/2 ծածկագրով մրցույթի գնահատող հանձնաժողովի նիստի արձանագրություն» վերնագրով ծանուցմանը կից ներկայացված փաստաթղթերի վերաբերյալ:

Ի պատասխան վերը նշված գրության՝ ՀՀ ֆինանսների նախարարությունը 28.12.2020թ. թիվ Ն/26-1/25460 գրությամբ հայտնել է, որ էլեկտրոնային գնումների համակարգում առկա տեղեկատվության վերլուծությունը ցույց է տալիս, **որ ԱԱԳԼ-ԳՀԱՇՁԲ-21/2 ծածկագրով ընթացակարգի շրջանակում գնահատող հանձնաժողովի քարտուղարի կողմից «ԱՇԿԱՐ» ՍՊԸ-ի՝ «armeps» համակարգում գրանցած pauk63@rambler.ru էլեկտրոնային փոստի հասցեով ոչ ավտոմատ ծանուցման եղանակով 15/12/2020թ. ժամը 14:38-ին ուղարկվել է էլեկտրոնային ուղերձ նամակ (կցվում է):**

Կցված ֆայլի ուսումնասիրությունից պարզ է դառնում, որ էլեկտրոնային ուղերձ նամակին կցվել է «ԱԱԳԼ-ԳՀԱՇՁԲ-21/2» ծածկագրով ընթացակարգի գնահատող հանձնաժողովի նիստի թիվ 21/2-4 արձանագրությունը, որտեղ, ինչպես արդեն արձանագրվել է սույն որոշմամբ, հստակ նշված են գների նվազեցման միաժամանկյա բանակցությունների անցկացման վայրը, օրը և ժամը:

Այսպիսով՝ հիմք ընդունելով վերոգրյալը և ուսումնասիրելով «Աշկար» ՍՊԸ-ի 22.12.2020թ. բողոքը՝ կից փաստաթղթերով, «Ա. Ի. Ալիխանյանի անվան ազգային գիտական լաբորատորիա (Երևանի ֆիզիկայի ինստիտուտ)» հիմնադրամի դիրքորոշումը, ինչպես նաև ՀՀ ֆինանսների նախարարության 28.12.2020թ. թիվ Ն/26-1/25460 գրությունը՝ գտնում եմ, որ «Աշկար» ՍՊԸ-ի կողմից ներկայացված բողոքը անհիմն է և ենթակա է մերժման:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝

Ո Ր Ո Շ Ե Ց Ի

«Աշկար» ՍՊԸ-ի կողմից 22.12.2020թ. ներկայացված բողոքը մերժել:

ՀՀ գնումների հետ կապված բողոքներ քննող անձի որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

ՀՀ գնումների հետ կապված բողոքներ քննող անձի որոշումն ուժի մեջ է մտնում այն տեղեկագրում հրապարակելուն հաջորդող օրվանից:

**Գնումների հետ կապված
բողոքներ քննող անձ՝**



ԳՐԻԳՈՐ ՆԵՐՍԻՍՅԱՆ